

শিরোনাম	সূত্র	তারিখ
স্বাধীনতা প্রতিষ্ঠার আহবানে ফরওয়ার্ড স্টুডেন্টস ব্লক	ফরওয়ার্ড স্টুডেন্টস ব্লকের প্রচারপত্র	৮ মার্চ, ১৯৭১

জয় স্বাধীন বাংলা
ফরওয়ার্ড স্টুডেন্টস ব্লকের ডাক
আপোসের চোরাবালিতে বাংলার এ স্বাধীনতার উদিত সূর্য যেন
মেঘাচ্ছন্ন না হয়

সংগ্রামী বন্ধুগণ,

সাড়ে সাত কোটি বাঙালীর স্বাধীনতা সংগ্রাম চলছে-ঘরে ঘরে আজ উড়ছে স্বাধীন বাংলার পতাকা। দুই যুগ ধরে যারা বাংলার রাজনৈতিক, সামাজিক আর অর্থনৈতিক ঐতিহ্যের চিহ্নটুকু নিশ্চিহ্ন করার জন্য স্বেচ্ছাচারের নির্মম, হিংস্র নখরের ধাবা এ বাংলার মাটিতে চালিয়েছিল-জাগ্রত বীর বাঙালীর রুদ্ররোধের মুখে আর কালের অবধারিত বিচারে বাংলার মাটি থেকে উৎখাত হয়ে আজ তারা আঁস্কাঁকুড়ে নিষ্কিণ্ড হবার পথে।

সংগ্রামী সাথী ভাইবোনেরা,

স্বাধীনতা প্রতিষ্ঠার এ দুর্জয় সংগ্রামকে খতম করার নিমিত্তে শোষণ চক্রের কারসাজির জাল বিস্তার সবিশেষ লক্ষণীয়। মুক্তিপাগল বাঙালীরা শোষণদের দু-একটি কারসাজির মুখোশ ইতিমধ্যেই আঁচ করতে সক্ষম হয়েছে।

বাঙলার জনপদ আজ বাংলার বীর মুক্তিফৌজদের রক্তে রঞ্জিত। বিদেশী সেনাদের পদচারণা বাংলার মাটি আজও অপবিত্র ও কলঙ্কিত।

এরই পটভূমিতে সে রক্তশোষণদের রুদ্ররোধের দাবানলের বহ্নিশিখা সাময়িক ক্ষীণতর হয়ে এ বাংলার মানুষের নজ্য কুন্তীরাশ্রু করা আরম্ভ করেছে।

মুক্তিকামী জাগ্রত ভাইবোনেরা,

ইয়াহিয়া-ভূট্টো-কাইয়ুম চক্র আজ আপোসের চোরাবালি সৃষ্টি করতে চাচ্ছে। প্রাসাদচক্রের এ বিস্তারিত জালের পতন অবশ্যস্বাভাবী কিন্তু আজ আমাদের সর্বগ্রাে আপোসের সেই জালে পদচারণা থেকে বিরত থাকার শপথ নিতে হবে।

সংগ্রামের ঐতিহ্যবাহী নিপীড়িত বাঙালী যদি পশ্চিমাদের সে আপোসের চোরাবালিতে পদচারণা করে তাহলে যুগের নির্ধারিত স্থানে আর ইতিহাসের অবধারিত কলঙ্কিত অধ্যায়েই বাঙালীদের স্থান হবে। আজকের এ স্বাধীনতা সংগ্রামের নায়কদের এ শিক্ষা গ্রহণ করা উচিত হবে, নচেৎ তাদেরকেও পলাশীর বিশ্বাসঘাতকদের দলেই ইতিহাসের রুঢ় বাস্তব চিহ্নিত করে রাখবে।

পরিশেষে বাংলার সাড়ে সাত কোটি জাগ্রত স্বাধীনতাকামী ভাইবোনদের নিকট আমাদের আকুল আবেদন, টেকনাফ থেকে তেঁতুলিয়া পর্যন্ত বাংলার ঘরে ঘরে মাতৃভূমি বাঙালাকে স্বাধীন করার যে দুর্জয় প্রতিজ্ঞা গর্জে উঠেছে তাকে যে কোন মূল্যে বাঁচিয়ে রেখে “স্বাধীন সমাজতান্ত্রিক বাঙলা দেশ” গঠন করতে হবেই। এরই প্রেক্ষিতে সর্বস্তরে ‘বাঙলা মুক্তিফ্রন্ট’ (Bengal Liberation Front) গঠন করণ, গ্রামে-গ্রামে, নগরে-নগরে, মুক্তি ফৌজ গড়ে তুলুন আর স্বাধীনতা সংগ্রামকে সঠিক গতিতে এগিয়ে নিয়ে চলুন। জয় আমাদের অবশ্যম্ভাবী।

জয় স্বাধীন বাঙলাঃ

বিনীত-

মোঃ লুৎফর রহমান
সভাপতি।

সৈয়দ ওয়াজেদুল করিম
সাধারণ সম্পাদক